

8. Dô sprach diu frouwe Kûdrûn: „sô¹⁾ diuhte ich mich geschant,
sit ich ein maget heize, und ir mich habet gemant
durch ander megede êre. des mûezet ir geniezen,“
sprach diu frouwe hère, „swie des mûesen miniu ougen riezzen.“
9. Sie giengen in ir hemeden, diu wâren beidiu naz.
den vil edelen frouwen was ê gewesen baz.
dô bidemte von dem froste daz arme ingesinde.
sie wâren swacher koste²⁾, jâ wurren in die merzischen winde.
10. Eꝛ was in den ziten, der winter sich zerlie,
und daz in widerstrite die vogeles wolden hie
singen aber ir wise nâch des merzen stunden.
in snêwe und ouch in ise wurden die vil armen weisen funden.
11. Mit strûbendem hâre sâhen sie sie gân.
swie in diu houbet wâren beiden wol getân,
ir vahs was in zerfûeret von merzischen winden.
eꝛ regente oder eꝛ snite, dicke wê was den vil edelen kinden.
12. Herwic der edele in guoten morgen bôt,
den ellenden kinden. des wære in dicke nôt,
wan ir meisterinne diu was vil ungehiure
„guoten morgen, guoten âbent“ was den minniclichen meiden tiure.
13. „Ir sult lâzen hoeren,“ sprach her Ortwin,
„wes disiu rîchen kleider ûf dem sande sin
oder wem ir waschet. ir beide sit sô schœne.
wie tuot er'z iu ze leide? daz in got von himele gehœne!“
14. Dô sprach vil trûriclichen daz schœne magêdin:
„er hât noch manige schœner dan wir mûgen sin.
nu frâget swes ir welle. wir haben ein meisterinne,
eꝛ kumt uns niht vergebene³⁾, siht siu uns mit iu sprchen abe der zinne.“
15. „Wes sint disiu erbe und ditze rîche lant
und ouch die guoten bûrge? wie ist er genant,
daz er iuch âne kleider lât so swache dienen?
wolt' er iht haben êre, sô solde im'z fûr guot vervâhen niemen.“
16. Siu sprach: „der fûrsten einer heizet Hartmuot:
dem dient lant diu witen und veste bûrge guot.
der ander heizet Ludewic von Ormanieriche:
im dient vil der helde; die sitzent in ir lande lobeliche.“
17. Dicke erblihte Herwic die junefrouwen an,
siu dûhte in sô schœne und ouch sô wol getân,
deiz im in sinem herzen harte stuften brâhte.
er gelichte sie ze einer der er vil dicke gûetlich gedâhte.
18. Dô sprach aber Ortwin, der kûnic von Ortlant:
„ich frâge iuch megede beide, ist iu iht bekant
umbe ein bergesinde, daz kom in ditze lant?
einiu was dar under, diu was Kûdrûn genant.“

¹⁾ Wenn ich auf diese Beschreibung nicht merkte. — ²⁾ Man hatte nur geringen Kostenaufwand auf sie verwendet. — ³⁾ Wir haben es nicht umsonst, wir werden es büßen müssen. — ⁴⁾ Wäre ihm an der Ehre gelegen, so sollte jedermann ihn darum tabeln.